

«Senza quai è la vita grischa»

Prest 20 onns è *Anna Pia Maissen* stada directura da l'Archiv da la citad da Turitg. La fin da mars va Anna Pia Maissen, ch'è creschida si a Cuira, en pensiun. La FMR ha fatg ina visita a la directura partenta che ha cumenzà a l'archiv avant passa 30 onns.

MARTIN GABRIEL/FMR

Cun in egl da tristezza ed in egl da legria bandunia ella l'archiv municipal da Turitg, ha *Anna Pia Maissen* ditg: «Jau sun trista da stuir bandunar la professiun da mes siemis. Da l'otra vart ma legrel jau d'esser en il futur mes agen capo.»

Anna Pia Maissen è entrada l'onn 1990 sco collavuratura scientifica en l'archiv da la citad da Turitg. Pli tard è ella daventada manadra da partizium e part da la direcziun da l'archiv. E l'onn 2003 è ella vegnida elegida sco directura. In sigl en l'aua fraida saja la lavur d'archivara stada l'emprim temp sco collavuratura. Il sguard enavos dettia dentant blera satisfacziun, forsa er perquai che sia lavur l'haja interessada e sfidada en tuttas fasas. Anna Pia Maissen è stada l'emprima dunna e l'emprima Ruman-tscha sco directura da l'archiv, e quai a Turitg: «Mia decleraziun da lezzas uras, ch'il dialect dal Grischun saja uss halt il nov dialect turitgais ha generà gronda ilaritad.»

FMR: *En pliras gasettas turitgaisas han ins pudì leger che Vos surdettias a Vossa successura in archiv en in stadi excellent, ma d'esperas era in team da collavuraturas e collavuratur che bleras superiuras u superiors prendessian fitg gugent?*

Anna Pia Maissen: Gea, en mintga cas poss jau dir cun luschezza, che jau surlasch in bun archiv cun in team fitg motivà a mia successura. Igl è in archiv modern che dispona d'in enorm potenzial da svilup. Sper l'archiv analog essan nus vidlonder da realisar l'archiv digital. E quai è actualmain la sfida principala per tut ils archivs publics. L'archiv analog e l'archiv digital han differents terms da temp. Nus stuain conservar infurmaziuns impurtantas a lunga vista e la furma digitala en quest format sa mida d'in cuntin e viva forsa tschintg onns. Nossa incumbensa è da chattar ina schliaziun tranter quels dus pols. È quai pussaivel u betg? E co? Questas dumondas occupeschan nus.

«Ins sto mantegnair la mirvegla ed il gust da viver e da scuvrir.»

Anna Pia Maissen, directura da l'archiv municipal da Turitg

Tge è il bel vi da la lavur?

Cur che jau hai cumenzà a lavurar qua en l'archiv na devi nagina furmaziun per questa professiun en Svizra. Che jau sun daventada archivara è stà ina casualitad. Jau aveva gist terminà mia lavur tar l'administraziun federala en l'Uffizi federal per fatgs da fugitivs a Berna. Mes professor da doctorat che lavurava per cas da quel temp sco vicedirectur en l'archiv municipal da Turitg m'ha dumandà da gidar cun in'exposiziun. Quai hai jau fatg, ed or da duas emnas è daventada dus mais, dus onns ed uschia vinavant. Jau ma regord: Mes emprim temp sco archivara è stà ina sfida enorma, essend che jau na saveva betg tge far. Las archivalias dal scrivant da la citad eran dentant uschè interessantas che jau hai bunamain emblidà d'archivar quellas. Gea, ed areguard las premissas: Cur che jau hai cumenzà qua, era l'unica premissa dad esser istoriografa. Oz dovri supplementarmain ina furmaziun en scienza d'infurmaziun ed in'affinitad per l'informatica. Ina premissa explicita è plinavant ch'ins na saja betg in tip da collectader – ins sto metter clers cunfins tranter interess ed effizienz.



Per Anna Pia Maissen è Turitg lieu da lavur – e sco ella di – er ses dachasa.

FOTO MAD

L'archiv da la citad da Turitg è il pli grond archiv communal en Svizra. Tge accents avais Vos mess sco directura?

Per mai èsi stà impurtant da tegnair pass cun ils svilupps technics che pertutgan nus tuts. Per exempel la digitalisaziun. En quest senn avain nus derasà sco in dals emprims archivs svizzers las metodos internaziunalas per la gestiun da documents entaifer l'administraziun. Il pli fitg a cor a mai è stà da posiziunar l'archiv sco center de prestaziun ed engaschi per noss servetschs, insumma per il servetsch public. L'archiv sto esser uschè avert sco pussaivel per noss public, la sava per entrar sto esser uschè bassa sco pussaivel e la trasparenza en nossas decisziuns maximala tenor las leschas. Quai è la meglra publicitad per in archiv. Da realisar quai ha fatg grond plaschair.

Voss bab, l'enconuscent professor Alfons Maissen è stà in passionà collectader e perscrutader dad usits e tradiziuns en il Grischun. El ha era realisà il Museum Regiunal Surselva a Glion e documentà millis da chanzuns popularas rumantschas. Avais vos ertà dal bab l'interess per l'istorgia e per il collectar?

(ri) Il regl de collectar n'hai jau strusch ertà da mes bab. Cun collectar na vegn ins numnadamain betg lunsch sco archivara. Na, jau schess plitost che jau sun vegnida socialisada da mes bab. Tge che jeu hai per franc emprim dad el è d'avair mirveglias e d'avair interess per tut quei che stat davos noss texts ed objects. Jau hai emprim da mes bab che documents scrits ed objects èn plain vita. Ch'els èn musaments da vita, da fantasia, da scienza, da lavur ni bella vita, da fortuna e calamitads. Adina han carstgauns chattà expressiuns da vita en scrittiras, en guaffens, en instruments, en utensils. Ed or da tut quai pon ins emprendre fitg bler. Jau crai che quai saja l'ierta la pli impurtanta da mes bab. Ins sto mantegnair la mirvegla ed il gust da viver e da scuvrir. Senza quai è la vita grischa. Ed jau vulesch che la vita sa preschientia en colurs traglischantas e carmalantas.

Tge document en l'archiv è per Vos persunalmain il pli interessant?

Cun 24 kilometers actas èsi natiralmain fitg difficil da far ina schelta. Ma, jau ves adina puspè novas chaussas interessantas. I dependa era da quai ch'interesscha la communitad gist en il mument. Actualmain è la di-

scussiun davart rassissem en il focus. Tge munta quai oz, sch'ina chasa a Turitg ha per exempel num «Zum kleinen Mohren»? Damai: Jau n'hai betg in document preferì. Per mai è la valur da l'infurmaziun impurtanta. Saja quai in contract or dal 10avel tschientaner ubain in document dal 21avel tschientaner. Tge di quest document a nus, en tge connex? Tge munta quai p.ex. sche nus chattain adina pli blers decrets dal 18avel tschientaner che scumondan da batlegiar? Quai vul dir che tut ils scumonds n'han gidà nagut. Questa constataziun dat interessantas infurmaziuns davart la situaziun sociala da quest temp.

Vos giais en pensiun bainprest. Cun tge plans?

(ri) Jau chal cun il ferm plan da chalar da far plans, strategias e concepts. L'emprim da tut vulesch jau giudair in pau d'esser libra da tuttas incumbensas. Cler che jau vegn a ma fateschentar cun ina chaussa u l'otra. En l'archivistica vulesch jau restar activa sin champ internaziunal, forsa puspè scriver in artigel u l'auter. E finalmain ma vulesch jau puspè detgar a las technicas da far gravuras che jeu hai emprim a la scola d'artisanadi a Turitg. Quai dovra temp ed indrizs. Per tut quai ha mancà la peda. E sch'i dat in u l'auter project interessant che splunta, lura na vegn jau probablmain betg a dir na.

Il pli grond archiv communal da la Svizra

L'archiv da la citad da Turitg n'è betg mo il pli grond archiv communal da la Svizra. El è il tschintgavel grond archiv da la Svizra insumma. Sias actas han ina lunghezza da 24 kilometers. L'archiv exista dapi il 1798. Las archivalias cumpiglian la citad da Turitg e las 19 vischnancas a l'ur che appartegnan oz a la citad. Er ils cudeschs dals burgais da temp tardmedieval ed ils registers parochials dapi la reformaziun èn archivads sut il tetg da l'archiv municipal. Il pli impurtant inventari d'archivalias è dentant las actas da las autoritads da la citad da Turitg dals davos passa 200 onns. L'archiv è sutta-mess al departament presidial da la citad da Turitg. La directura Anna Pia Maissen è dapi il 2003 directura da l'archiv.